



Sud Bosne i Hercegovine
Суд Босне и Херцеговине

Broj: S1 3 IŽ 048787 24 IŽ
Sarajevo, 07.08.2024.godine

Sud Bosne i Hercegovine u Sarajevu, u Apelacionom upravnom vijeću sastavljenom od sudija Dinke Bešlagić Čovrk kao predsjednika vijeća, Mirsade Džindo i Hilme Vučinića, kao članova vijeća, odlučujući o žalbi političke stranke SBiH – Stranke za Bosnu i Hercegovinu izjavljenoj protiv Odluke Centralne izborne komisije Bosne i Hercegovine broj: 05-1-07-5-1065/24 od 01.08.2024. godine, o utvrđivanju odgovornosti za vođenje preuranjene izborne, u nejavnoj sjednici, održanoj dana 07.08.2024. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu utvrđena je odgovornost političke stranke SBiH – Stranke za Bosnu i Hercegovinu iz razloga što je pristalica ove političke stranke Almir Bečarević predsjednik Kantonalnog vijeća SBiH Kantona Sarajevo, putem medija vodio preuranjenu izbornu kampanju, čime je prekršila pravila ponašanja u izbornom periodu iz člana 7.1. Izbornog zakona BiH, pa joj je na osnovu člana 6.7 stav (2) tačka 1) Izbornog zakona BiH i primjenom člana 19.9.stav (1) tačka 3) i stav (2) Izbornog zakona BiH izrečena novčana kazna u iznosu od 3.500,00 KM (slovima: tri hiljade i petsto konvertibilnih maraka).

Protiv navedene odluke žalbu je izjavila politička stranka SBiH – Stranka za Bosnu i Hercegovinu. U žalbi navodi kako SBiH - Stranka za Bosnu i Hercegovinu nije tražila, nije organizovala, nije platila, nije uticala i samim tim nije imala nikakve veze sa objavom na portalu Klix, te da je video zapis nastao očigledno van zahtjeva i organizovanja Stranke za BiH ili Almira Bečarevića, kao i da je sam naslov slobodna uređivačka politika portala, bez učešća Stranke za BiH. Navodi da u sali nigdje nije bilo političkih obilježila niti slika i da se o tome posebno vodilo računa, samo je bila postavljena zastava BiH. Ističe da na press konferenciji ni na jednom mjestu nije bilo govora o programima stranaka za općinske izbore, niti o programima kandidata. kao i da je na pomenutoj press konferenciji urađeno i provedeno tako da se ne narušava izborni proces, te da niti na jednom mjestu. tokom press-a, nije spomenuto ništa što

se tiče izbornog procesa u općinama, programa ili kandidata, osim osvrta na globalno stanje u KS-u. Nadalje, navodi da objava na portalu klix nije bila plaćena, već je portal preuzeo, u skladu sa uređivačkom politikom, na koji nemaju uticaja. Isto tako, navodi da u vrijeme održavanja press konferencije Stranka za BiH nije niti predala liste za izbore, te time nisu niti potvrđeni kandidati za izbore, kako za načelničke pozicije, tako i općinska vijeća. Na kraju, ističe da Stranka za Bosnu i Hercegovinu nije prekršila odredbe člana 7.1 Izbornog zakona BiH, te predlaže da bude oslobođena odgovornosti i plaćanje novčane kazne.

U odgovoru na žalbu Centralna izborna komisija Bosne i Hercegovine (u daljem tekstu CIK BiH) je predložila da se žalba odbije kao neosnovana.

Žalba nije osnovana.

Iz stanja spisa proizilazi da je Centralna izborna komisija Bosne i Hercegovine na 48. sjednici dana 01.08.2024. godine, postupajući po službenoj dužnosti u predmetu kršenja odredbe člana 7.1 Izbornog zakona BiH od strane političke stranke SBiH - Stranka za Bosnu i Hercegovinu, donijela Odluku broj: 05-1-07-5-1065/24 od 01.08.2024. godine, kojom je izrekla novčanu kaznu u iznosu od 3.500.00 KM političkoj stranci SBiH - Stranka za Bosnu i Hercegovinu jer je odgovorna što je pristalica ove političke stranke, Almir Bečarević, predsjednik Kantonalnog vijeća SBiH Kantona Sarajevo, putem medija vodio preuranjenu izbomnu kampanju, čime je prekršila pravila ponašanja u izbornom periodu iz člana 7. 1 Izbornog zakona BiH.

Centralna izborna komisija Bosne i Hercegovine je dana 11.07.2024. godine. na osnovu saznanja o objavi i video zapisu press konferencije pod naslovom „Šta podrazumijeva sporazum SDA, SBiH i DF u Sarajevu: Poznati svi kandidati, NES odbio učestvovati“, objavljene na portalu klix.ba, izvršila uvid u predmetni video zapis i objavu. kako bi se utvrdilo eventualno kršenje odredbe člana 7.1 Izbornog zakona Bosne i Hercegovine (“Službeni glasnik BiH”. br. 23/01. 7/02. 9/02. 20/02. 25/02. 4/04. 20/04. 25/05. 52/05, 65/05. 77/05. 1 1/06. 24/06. 32/07. 33/08. 37/08. 32/10. 18/13. 7/14. 31/16. 41/20. 38/22. 51/22. 67/22 i 24/24).

Imajući u vidu odredbu člana 6.2 stav (2) Izbornog zakona BiH. Centralna izborna komisija BiH je po saznanju za učinjenu povredu iz svoje nadležnosti. pokrenula postupak po službenoj dužnosti protiv političke stranke SBiH - Stranka za Bosnu i Hercegovinu, te je u skladu sa zakonskom procedurom, aktom broj: 05-1-07-5-1098-2/24 od 12.07.2024. godine informacije o saznanjima dostavila političkoj stranci SBiH - Stranka za Bosnu i Hercegovinu na izjašnjenje, a posebno da se izjasni Almir Bečarević u roku od 24 sata od prijema akta.

U ostavljenom roku, dana 16.07.2024, godine. politička stranka SBiH - Stranka za Bosnu i Hercegovinu navodi da nije zakazala sazvala press konferenciju, te da nije tražila prisustvo medija. Nadalje, navodi da na događaju nije bilo stranačkih obilježja, te da su sastanci održani sa predstavnicima drugih stranaka bili internog karaktera, kao i da sadržaji istih nisu objavljeni na Facebook ili web stranici SBiH.

Takođe. izjašnjenje na navode dostavio je i Almir Bečarević u kojem navodi da SBiH - Stranka Bosnu i Hercegovinu nije tražila, organizovala, niti platila, ni utjecala i samim tim nije imala nikakve veze sa objavom na portalu klix.ba, te da je video zapis nastao van zahtjeva i organizovanja SBiH - Stranka za Bosnu i Hercegovinu ili Almira Bečarevića, kao i da je sam naslov slobodna urednička politika portala, bez učešća stranke kao i njega lično.

Iz stanja spisa proizilazi da je uvidom u kompletan spis predmeta i dokaze, video zapis press konferencije objavljen na klik.ba portalu, Centralna izborna komisija Bosne i Hercegovine je utvrdila da je politička stranka SBiH - Stranka za Bosnu i Hercegovinu odgovorna za kršenje odredbe člana 7. 1 Izbornog zakona BiH, jer je Almir Bečarević, predsjednik Kantonalnog vijeća SBiH Kantona Sarajevo putem medija vodio izbornu kampanju u periodu preuranjene izborne kampanje.

Naime, odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu kampanja.

U članu 1. 1a stav (1) tačka 8) Izbornog zakona Bosne i Hercegovine propisano je da je "Preuranjena kampanja" svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav (1) Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH”, broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom (2) istog člana propisano je da se zabrana iz stava (1) ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Suprotno navodima žalbe da" niti na jednom mjestu, tokom press-a, nije spomenuto ništa što se tiče izbornog procesa u općinama, programa ili kandidata, osim osvrta na globalno stanje u KS-u", valja istaći da je provjerom video zapisa sa press konferencije, u kojem Almir Bečarević, predsjednik Kantonalnog vijeća SBiH Kantona Sarajevo izjavljuje: "Moram reći da bez ijednog visokog tonaliteta smo došli do ovog rezultata, ono što će SBiH ponuditi na ovim Općinskim izborima smatram da je najbolje od najboljeg kod nas u stranci, kao što je gospodin Kapidžić rekao za Općinu Novi Grad, gospodin Semir Efendić, na kraju krajeva ne trebamo ga ni predstavljati jer to je aktualni načelnik, a što se tiče Općine Novo Sarajevo Muamer Bandić, naš šef kluba u Skupštini KS i smatram da je to dovoljan razlog za sve glasače da podrže ova dva kandidata uz normalnu podršku DF i SDA u ovom segmentu kandidata za općinskog načelnika"...kao i.... Ove tri stranke vide šta se dešava i samim našim aktivnostima u Skupštini Kantona Sarajevo stalno to

potenciramo, znamo kakva je situacija strankama trojke odnosno do čega su doveli pojedine općine i mislim da imamo adekvatan odgovor da smo dali dobre kandidate, da ćemo biti uspješni. i da ćemo dobiti podršku građana i da ćemo na kraju krajeva već ovaj dogovor koji smo postigli reflektirati sa što većim brojem načelničkih mjesta, da tim krenemo u određene promjene, odnosno poboljšanje stanja koje vidimo u Kantonu da nije baš tako dobro, u nekim stvarima čak zaista neshvatljivo odsustvo reakcija aktualne vlasti"...proizilazi nesporna činjenica da objava u svom opisu i sadržaju pokazuje promociju programa političke stranke za predstojeće Lokalne izbore 2024. godine, koja je imala za cilj upoznavanje javnosti i birača sa programom navedene stranke, te se može shvatiti i kao predstavljanje kandidata a ne samo poziv biračima.

Bez uticaja na drugačiju odluku u konkretnom slučaju je činjenica da se na navedenom video zapisu u konkretnom slučaju ne nalazi logo stranke, jer su objavljena imena kandidata uz izjave kao na što će SBIH ponuditi na ovim Općinskim izborima smatram da je najbolje od najboljeg kod nas u sporne objave, proizilazi da je u pitanju izborna kampanja s obzirom na političke poruke koje su upućene i odnose se na promociju kandidata da su najbolji. Tekst spornih izjava ..."da smo dali dobre kandidate, da ćemo biti uspješni, i da ćemo dobiti podršku građana"... je tipičan primjer upoznavanja birača sa svojim kandidatima za predstojeće izbore. a u isto vrijeme poziv biračima da 6. oktobra izadu na izbore i glasaju za SBIH i za njene kandidate, te navod da objava na portalu Klix nije bila plaćena, već je portal preuzeo, jer se radilo o istoj nedozvoljenoj radnji u smislu člana 19.9 stav 1. tačka 3. i stav 2. Izbornog zakona BiH odnosno to jest o promociji političke stranke prije zvanične izborne kampanje.

Valja istaći da iako Centralna izborna komisija BiH u momentu podnošenja podneska nije ovjerila kandidate za učestvovanje na Lokalnim izborima 2024. godine, te iz navedenih razloga nije ni mogla utvrditi ličnu odgovornost imenovanog kao kandidata, nesporno je utvrđeno kršenje odredbe čl. 7.1 Izbornog zakona BiH od strane Almira Bečarevića, predsjednika Kantonalnog vijeća SBIH Kantona Sarajevo, kao pristalice političke stranke SBIH - Stranka za Bosnu i Hercegovinu, iz čega proizilazi odgovornost političke stranke SBIH - Stranka za Bosnu i Hercegovinu, te se u smislu odredbe člana 19.9 stav (2) Izbornog zakona BiH za prekršaj koji počinji pristalica političkog subjekta, kažnjava taj politički subjekt, u konkretnom slučaju politička stranka SBIH - Stranka za Bosnu i Hercegovinu.

Izjašnjenje političke stranke SBIH - Stranka za Bosnu i Hercegovinu i Almira Bečarevića, kojim obrazlažu sporne objave, nije opravdanje i ne utiče na drugačiju ocjenu, imajući u vidu da su predmetne objave nastale u periodu prije zvaničnog početka izborne kampanje, koje imaju sve elemente kampanje, zbog čega je Centralna izborna komisija BiH pravilno ocijenila da je u smislu odredbe člana 7.1 Izbornog zakona BiH, radnje kampanje koje nisu dozvoljene u period od raspisivanja izbora do perioda zvaničnog početka izborne kampanje, te je u skladu s tim pravilno izrečena novčana kazna u iznosu određenom dispozitivom pobijane odluke.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA
S U D I J A
Dinka Bešlagić Čovrk**